


ALAHADY SAMPANKAZO - TAONA D2019



« Fiadanana anie any an-danitra, ary voninahitra anie any amin'ny avo indrindra »

(Lk. 19: 38)

Vakiteny I : Eks. Iz. 50, 4-7

Tononkira : Salamo 21

Vakiteny II : Fi1. 2, 6-11

Evanjely : Lk. 22, 14 – 23, 56

Ry Kristianina havana, izao Alahadin'ny sampankazo izao no mampiditra antsika amin'ny herinandro masina izay ankalazantsika ny famonjena antsika dia Andriamanitra nanaiky hanavotra antsika, nanaiky nanolotra ny ainy ho antsika, nanaiky ho faty hanafaka antsika amin'ny fahotana. Masina izay miombona amn'Andriamanitra.

Masina izao herinandro izao satria mampiombona amn'Andriamanitra. Masina isika satria miombona amin'Andriamanitra. Araraoty ary izao herinandro masina izao iombonantsika bebe kokoa amin'Andriamanitra. Maro ny famantarana hibanjinintsika mandritra izao herinandro masina izao hanampy antsika mamelombelona ny finoantsika ary ny finoana no hahazantsika mandray izao herinandro izao ho masina ka mitondra antsika amin'ny Paka izay hahatonga antsika ho zava-boahary vaovao ao amin'Andriamanitra, anambarantsika fa olombaovao tokoa isika. Izany no dikan'ny fanavaozantsika ny batemy sy andraisan' ireo olon-dehibe ny sakramenta maha zanak'Andriamanitra izany amin'ny alin'ny asabotsy masina. Ny fankalazana ny Paka dia

ankalazantsika koa ny fijalian'i Kristy izay atomboka ny alahady sampankazo, arakaraky ny taona litorjika no amakiansika ny evanjely fa ny zoma masina dia ny evanjely nosoratan'I Md Joany ihany, tsy miova. Ka ny taona D tahaka izao dia I Md Lioka no vakintsika ka ny fijalian'I Jesoa araky Md Lioka no banjinintsika amin'izao Alahady ny sampankazo izao. Noho ny fitsilovan'ny Fanahy masina dia samy manana ny tsindrimpeo ireo mpanoratra ny evanjely, tsy mpanao reportage izy ireo fa manambara ny Vaovao Mahafaly nentin'i Jesoa. Mifototra amin'ny zavatra telo ny tian'I Md Lioka ambara raha nanoratra ny Evanjely mitantara ny fijalian'I Jesoa Kristy izy.

Ny voalohany dia ny fivavahana, nivavaka tokoa I Jesoa ary ampianariny hanao an'izany isika satria io no làlam-pamonjena ho antsika *"Nahoana ianareo no matory, mifohaza mivavaha mba tsy ho azon'ny fakam-panahy"* Ny ady izay ataontsika amin'izao karemy izao dia miaraka amin'ny vavaka izay fiombonana amin'Andriamanitra, izay no manambara maha zavaboahary antsika raha miombona amin'Andriamanitra isika, koa mivavaha miambena mba tsy ho latsaka amin'ny fakampanahy. Ny ady rehetra nataon'I Jesoa dia natrehiny tamin'ny alalan'ny vavaka, izay rehetra nataony dia mivavaka. Ny farantampon'ny vavaka dia ny fijaliana niainan'I Jesoa tamin'ny lakroa, io no vavaka farantampony. Izany no banjinintsika amin'izao Alahady ny sampankazo izao, io no foto-kevitra lehibe ary izany no ataontsika amin'izao herinandro masina izao sy hanasana antsika. Aoka hivavaka isika, tsy amin'izao herinandro masina izao ihany raha tiantsika ho zavaboahary vaovao isika, aoka hivavaka lalandava.

Izany no mbola ambaran'i Jesoa rehefa niady tamin'ny fakam-panahy izy ka nitodika tamin'i Piera *" Ry Simona, indro I satana mitady hikorokoroka anareo tahaka ny nataony tamiko, izaho mangataka ho anao, mivavaka ho anao mba tsy ho lavo ny finoanao ka raha mibebaka ianao dia hamafiso ny rahalahinao"* Mivavaka ho antsika I Jesoa tahaka ny nataony ho an'I Piera ka tsara raha miroso amin'izany làlam-piainana izany isika, aoka ho fiainam-bavaka ny fiainantsika mba ho Eglizy Olona Velona isika, ny maha Eglizy ny Eglizy dia ny mivavaka.

Ny faharoa tian'I Md Lioka ho tsapantsika dia i Jesoa tsy nanam-pahotana sy tsy manan-keloka, *"tsy hita izay maha meloka io lehilahy io"* ny teny matetika miverina amin'ny evanjely novakiansika androany. Voaheloka tsy andrariny I Jesoa ary nahatsapa an'izany ilay jiolahy teo akaikiny ka nanambara tamin'ilay jiolahy namany izay naneso an'I Jesoa nanao hoe *" ny antsika dia rariny izao satria nandray valin'ny ratsy nataontsika isika fa ny azy kosa tsy mba nanao ratsy na inona na inona izy "*. Dia hoy I Jesoa namaly azy *"anio alina ihany dia hiaraka amiko any amparadisa ianao"*. I Jesoa voaheloka na dia olomarina aza ary ny kapiteny teo koa nilaza fa olomarina tokoa io lehilahy io. Tsy maintsy etrehintsika izany ny eso sy ny fanaratisana, tsy ny zavatra ety ivelany mety mavesatra fa aoka isika hijoro amin'ny finoana. Fampianarana ho antsika izany zavatra niseho tamin'I Jesoa. Maro ny zavatra miseho teo anivon'ny Eglizy, marina fa tsy antsika no mitsara fa Andriamanitra, fa maro ny voaheloka tsy aradrariny ka mampalahelo. Misy ny te hamono antsika, ny mamono vatana no azon'izao tontolo izao atao fa tsy afaka hamono fanahy kosa izy ireo. Hitantsika izany tamin'ny fiainan'I olontsambatra Lucien Botovasoa izay ankalazaina ny 17 aprily raha ny tokony ho izy fa noho ny herinandro masina dia atao aorian'ny Paka. Nijoro ho olomarina izy, mitaky an'izany tokoa izao androntsika izao, enga anie ny fidirantsika amin'ny herinandro hanampy antsika handresy ny ratsy amin'ny alalan'ny tsara fijoroana ho vavolombelona.

Ny fahatelo dia ilay vavaka henontsika teo tsy ankandrina na amin'ny molotra fa niantefa tamin'ny fainanan'I Jesoa ka nahatonga azy nanolotra ny ainy ary izany ny vavaka farantampony ka raha niaraka tamin'ireo apostoly izy dia nanolotra ny ainy ka tanteraka izany raha nilaza izy vatako atolotra ho anareo ny rako alatsako ho anareo, tanteraka ny fanolorantenany, ny fahafoizana izay nataony.

Azo asongadina amin'izao fidirantsika ny herinandro masina ka hibanjinantsika ny fijalian'I Jesoa araka nosoratan'I Md Lioka dia ny vavaka sy fahafoizana. Azontsika faranana amin'ny vavaka nataon'I Jesoa teo ampototry ny hazo fijaliana "*apetrako ampelantananao ny fanahiko, Raiko avelao ny helony fa tsy fantany izay ataony,*" io koa ny teny nataon'ny olontsambatra Lucien Botvasoa. Aoka hahay hifamela heloka isika, hifampizara ny famindrampo, araka ny tenin'I Papa Fransoa raha tiantsika ho hisy fandriampahalemana ny fiainantsika aoka isika hifamela heloka, aoka isika hifampizara famindrampo, raha tiantsika hanana fiadanampo isika dia aoka hifamela heloka.

Raha mibanjina ny fijalian'I Jesoa isika, raha miditra amin'izao herinandro masina izao, ady sady dia ny fiainantsika, ady amin'ny ratsy ka ny fototra hanoheranantsika izany dia ny vavaka, fanolorantena ary fahafoizana amin'ny alalan'ny fifamelankeloka sy fifamindrampo.

Ampio izahay ry Andriamanitra Rainay amin'izao fidiranay amin'ny herinandro masina, mba hiombona bebe kokoa amin'I Jesoa zanakao, amin'izay hahay hamolatena izahay ka hahay hivavaka bebe kokoa handalina ny finoanay ka hahafoy amin'ireo manodidina anay indrindra ireo mahantra ka hivelona ireo asan'ny famindrampo hanehoanay fa Ray be fitiavana nahafoy an'I Jesoa ianao ka izahay koa hirahinao hahafoy amin'ireo manodidina anay. Raha mahay mifamela heloka sy mifamindra fo izahay dia hiadana tokoa ka hampijoro tontolom-pinoana, tontolom-piainana sy tontolo iainana vaovao ka zary ho Eglizy Olona Velona mankalaza ny Paka izahay ka hanorina Eglizy Tranon'Andriamanitra ka ho taranaka mpanorina eo anivon'izao tontolo izao ka na dia misy ny mpanaratsy tsy ho menatra ny finoana izahay fa hijoro noho ny hasin'izao herinandro hiainanay izahay ka hahatonga anay hivelona ny Paka amin'ny fiainanay andavanandro. Amen

Mompera Arsevka Benjamin Ramaroson